

## 09.03 PROFIL

---

### **Bettina Vital: «Cultura è in grond pled en mia vita»**

*La passiun per cultura, musica e lingua sa tira sco in fil cotschen tras la vita da la romanista independenta engiadinaisa.*



L'Engiadinaisa Bettina Vital viva cun sia famiglia ad Uetikon al Lai da Turitg. Là lavura la dunna da 41 onns sco romanista independenta, organisatura d'occurrenzas culturalas, traductura ed intermediatura da cultura en in pensum da radund 50%. Tranter auter organiseschan ella e ses um era l'Operetta giò'n Plazzetta ad Ardez. La coordinaziun da lavur e famiglia saja per ella e ses um, ch'è chantadur professional e dirigent, adina puspè ina sfida. «Noss model da famiglia funcziuna bler meglier sco independents», di ella. Avant che Bettina Vital ha cumenzà a studegiar a l'Universitad da Turitg cumparatistica, ha ella fatg ina storta sur il mund da la gastronomia cun cumenzar ina scolaziun sco hoteliera. La cultura, la musica e la lingua – en quella direcziun è ella ida la finala. Cunquei che Bettina Vital fa lavurs multifaras en differents lieus, sa numna ella oz era gugent «creacultura».

*Redacziun: Anna Caprez*